

中國古典文學基本叢書



徐渭集

二冊



中國古典文學基本叢書

徐渭集

第二冊

中華書局

卷十一 七言絕句

贈呂山人

西陵渡頭秋水寒，年年歲歲走儒冠。不知天姥山中客，十載關門傲長官。

龔山凱歌

爲吳縣史鼎菴

島夷歲歲理舟航，入寇三吳與浙江。分向沙洲知幾道？將軍着處駐油幢。

二

縣尉卑官祿米微，教辭黃綬着戎衣。賊中何事先寒膽，海上連年數破圍。

三

曹娥官渡帶鉤縈，僊尉乘潮上下行。砲石朝飛方斷岸，江天夜雪欲偷營。

四

短劍隨鎗暮合圍，寒風吹血着人飛。朝來道上看歸騎，一片紅冰冷鐵衣。

五

紅油畫戟碧山坳，金鏃無光入土消。冷雨淒風秋幾度，定誰拾得話今朝。

六

七尺龍蟠皂線纒，倭兒刀挂漢兒腰。向誰手內親拚得？百遍衝鋒滾海蛟。
宋時海寇名滾海蛟。

七

無首有身祇自猜，左啼魂魄右啼骸。憑將老譯傳番語，此地他生敢再來。

八

旗裹金瘡碎朔風，軍中吮卒有吳公。更教厮養眠營竈，自向霜槽餵鐵聰。

九

夷女愁妖身畫丹，夫行親授不縫衫。
倭衫無縫。今朝死向中華地，猶上阿蘇望海帆。
其地阿蘇山最高。

嘉靖辛丑之夏，婦翁潘公卽陽江官舍，將令予合婚，其鄉劉寺丞公代爲之媒，先以三絕見遺。後六年而細子棄帷，又三年聞劉公亦謝世。

癸丑冬，徙書室，檢舊札見之，不勝悽惋，因賦七絕

十年前與一相逢，光景猶疑在夢中。記得當時官舍裏，熏風已過荔枝紅。

二

華堂日晏綺羅開，伐鼓吹簫一兩迴。帳底畫眉猶未了，寺丞親着絳紗來。

三

筵前半醉起逡巡，窄袖長袍妥着身。若使吹簫人尚在，今宵應解說伊人。

四

聞君棄世去乘雲，但見緘書不見君。細子空帷知幾度，爭教君不掩荒墳。

五

掩映雙鬟繡扇新，當時相見各青春。傍人細語親聽得，道是神僊會裏人。

六

翠幌流塵著地垂，重論舊事不勝悲。可憐惟有妝臺鏡，曾照朱顏與畫眉。

七

篋裏殘花色尚明，分明世事隔前生。坐來不覺西窗暗，飛盡寒梅雪未晴。

內子亡十年，其家以甥在，稍還母所服，潞州紅衫，頸汗尚泚，余爲泣

數行下，時夜天大雨雪

黃金小紐茜衫溫，袖摺猶存舉案痕。開匣不知雙淚下，滿庭積雪一燈昏。

將入閩，方許二君餞別分韻

萬丈高城控井闔，誰家池館隔江津。勝筵不用扶紅袖，楊柳芙蓉擁醉人。

凱歌二首贈參將戚公

南塘

戰罷親看海日晞，大酋流血濕龍衣。軍中殺氣橫千丈，並作秋風一道歸。

二

金印纍纍肘後垂，桃花寶玉稱腰支。丈夫意氣本如此，自笑讀書何所爲。

望夫石

海天萬里渺無窮，秋草春花插鬢紅。自送夫君出門去，一生長立月明中。

宴遊爛柯山

萬山松柏遶旌旗，少保南征暫駐師。接得羽書知賊破，爛柯山下正圍碁。

二

偏裨結束佩刀弓，道上逢迎抹首紅。夜雪不勞元帥入，先禽賊將出洄中。

三

羣兇萬隊一時平，滄海無波嶺瘴清。帳下共推擒虎將，江南只數義烏兵。

四

帷巾談笑靜風塵，只用先鋒一兩人。萬里封侯金印大，千場博戲采毬新。

武夷山一線天

雙峽凌虛一線通，高顛樹果拂雲紅。青天萬里知何限，也伴藤蘿鎖峽中。

入武夷尋一線天，道中述事二首行渴，得巖廬，乞茗。

花落花開隔水津，棧梯茆屋總堪鄰。扁舟若不尋歸路，便是武陵深處人。

二

乞得瓊漿一碗新，沿溪行盡渴生塵。雲英只在桃花下，不肯呼來見外人。

雪中訪嘉則於寶奎寺之樓店

山徑尋君重復重，小樓百尺臥元龍。安窗偏向梅花角，去映江天雪數峰。

至歙寄方阜民公子

弱冠曾從泮水行，今來已是老門生。不知舊種祠前木，幾葉參雲拂太清。

凱歌四首贈曹君

曾從幕府事南征，羽檄傳來急似星。報道參戎深入處，當鋒還有一書生。

二

同時操筆總紛紛，先着緋袍獨數君。今日江南浮彩鷁，他年塞北戰黃雲。

三

文士爭雄武藝場，桃花馬上撥金鎗。試看古來懸印客，那取霜毫一寸長？

四

賊騎如雲鳥不通，突圍攬陣屬先鋒。橫腰金帶緣何得？爲報將軍第一功。

南浦橋

南浦飛梁百尺遙，雲收不去霽虹驕。長蛟子母休吹浪，何代偏無周處刀。

七里灘二首

百番獅象一溪涵，一頃銀光萬箇頭。水石何緣能有此？星辰盡夜殞寒流。

二

淺水鑾頭蘸幾堆，清涎齒縫破生梅。竹舟欲過從何處，無數游魚磕額回。

答謝太興海門 值秋試罷入京

江上芙蓉千萬枝，交花結葉弄秋姿。片帆此日江湖去，怕接郎官送別詩。

武林館中與徐仁卿同宿，因贈徐號天峰，武義諸生也，徐千斤。

樓上張燈倒瓦卮，自居東面喚人陪。須臾據案言兵事，駢帽偏欹橫兩眉。

二

近來選士愛軀長，共說君家貌不揚。醉後忽呼高枕睡，虎頭斜倚黑繩牀。徐額骨似虎。

三

自造提刀偃月文，諸工圍煨焰吹雲。當時試舞猶嫌薄，鐵櫛連環六十斤。

四

海中黠盜計何勞，羅拜庭前嶺月高。財出錦綉還未獻，一時叱咤夜深逃。舊有海會持綉夜還，徐叱走之。

五

長說邊關好試材，幕中進止自須裁。連宵一騎重圍裏，不見鈞州王秀才。
時王邦直爲北虜所害。

東池觀魚

南舟北馬不相得，北兔南魚各自潛。今日中流看水獵，絕勝馳射天山尖。

寄趙君時將買妾，戲贈之。

誰家女子別爺娘，繡轎珠簾一片光。轉到門庭怯夫婿，任教咿啞咏催妝。

二

嬌羞偏逐見時生，郎爲新人出戶迎。一道苔墀鋪麝褥，兩行花燭映金屏。

三

宮髻一鬟堆燕雛，胭脂兩朶暈紅酥。三千仙子雲中有，十五吳姬天下無。

四

司馬相如賦本工，文君玉面貼芙蓉。只今才貌都相似，祇有彈琴事不同。

五

王孫姓趙好門楣，空有文章未遇時。便把眞珠量幾斛，買將紅粉共羅帷。

六

妾住錢塘路不遙，每攜姊妹看秋潮。爲郎遠渡桐江水，女伴雙雙不可招。

贈醫僧

窗含絕壁從天落，門遠長江入海流，手綰藥囊醫世上，前身可是藥師不？

錢塘送王間川[○]

別後長鬚已皓然，重來湖上放湖船。不能一日陪清話，眞愧相知十五年。

次王先生偈四首^{龍溪老師}

法高不用十分多，一尺還君一丈魔。自己國王降不伏，九江何用遣隋何？

[○] 原奪「送」字，依目錄補。

中國古典文學基本叢書

